

山左金石志

山左金石志卷第二十三

兵部員外郎都察院都御史督理山東巡撫加三級陞
內閣學士禮部郎中李賢等奏請將前山東學政加三級陞
同撰

元石

修真宮提點王志道道行碑

延祐元年二月立正書篆額碑高五尺六寸廣二尺六寸
在淄川縣七里店修真宮

右碑額題修真宮記二行字徑三寸五分文二十行字徑
九分思濟撰文李克通書丹并篆額

堂邑縣尹張君去思碑

延祐元年三月立行書碑高五尺廣二寸六寸在堂邑縣
右碑篆額未拓文二十七行字徑八分元明善撰并書篆

額

太虛宮螭首題字

延祐元年五月立正書在青州府學

右刻未見拓本據段赤亭益都金石記載之螭首高一尺餘其一刻年月姓名三行其一刻年月姓名一行皆有太虛宮字

重修東嶽廟碑

延祐元年九月立并額及陰俱正書碑高七尺六寸廣三尺一寸在萊蕪縣東嶽廟

右碑額題重修東嶽行宮之碑二行字徑二寸八分文及標題銜名凡三十五行字徑一寸於商隱撰文高秉崇題額并書碑陰刻施主官吏士庶道士姓名四十八行字徑

八分

靈岩寺就公禪師道行碑

延祐元年九月立正書篆額碑高六尺四寸廣三尺二寸五分在長清縣靈岩寺

右碑額題就公禪師道行之碑四行字徑三寸文二十七行字徑一寸沙門覺達撰書

靈岩寺舉公壽塔碑

延祐元年九月立并額俱正書碑高三尺六寸廣一尺四寸五分在長清縣靈岩寺

右碑額題舉公提點壽塔三行字徑二寸四分其上又有咒語七字徑一寸五分文十一行字徑一寸

萬戶劉侯神道碑

延祐二年二月立尺寸字體未詳在齊河縣西南劉公墓上

右碑未見拓本據朱朗齋所錄載之文爲杜質撰李好義書石天英篆額

清河郡伯張公墓碑

延祐二年三月立正書碑高九尺廣三尺五寸在城武縣小房山張公墓上

右碑篆額未拓文二十二行字徑一寸二分元明善撰趙孟頫書王穀篆額

泰安州重修廟學碑

延祐二年八月立并陰俱正書篆額碑高六尺八寸廣二尺六寸在泰安府學

右碑額題重修廟學之記二行字徑三寸五分文二十二
行字徑一寸教授尚毓德撰教諭王翼書篆碑陰刻官吏
姓名二十五行字徑六分

淄川縣學加封聖號碑

延祐二年九月立并額及陰俱正書碑高八尺八寸廣三
尺二寸五分之在淄川縣學

右碑額題大元加封大成至聖文宣王聖號之碑三行字
徑二寸五分以上層刻聖旨十五行字徑一寸下層刻文二
十七行字徑一寸劉敏中撰書碑陰刻官吏社長姓名多
漫漶

靈岩寺執照碑

延祐二年九月立正書篆額碑高七尺四寸廣二尺九寸

在長清縣靈岩寺

右碑額題宣賜靈岩聖旨之碑二行字徑三寸五分文二十六行字徑八分年月一行字徑一寸五分以上有鈐印一蒙古篆文方徑一寸八分此碑因朝廷開煉長清銀洞侵及靈岩寺山場請官給照勒石以垂永久也

曹縣盤石鎮創修廟學碑

延祐二年十二月立正書碑高四尺八寸廣二尺四寸在曹縣盤石鎮文廟

右碑額未拓文二十五行字徑五分孫仁撰文李世傑題額書人名已缺

延祐義舉題字

延祐二年造正書陽文在淄川縣高氏

右資襄未詳形製其底圓徑五寸中題延祐二年四字左
王六二字右公造二字徑一寸

重修東嶽廟碑

延祐三年正月立正書碑高五尺五寸廣二尺三寸在灘
縣東嶽廟

右碑額未拓文二十三行字徑八分石可大撰書傅汝梅
題額

松巖純貞子墓碣銘

延祐三年二月立正書篆額碑高四尺八寸廣二尺一寸
在長清縣五峯山

右碑額題松巖純貞子墓碣銘四行字徑二寸五分文二
十一行字徑八分李世傑撰蔡祐書并篆

翠微亭安仁甫詩刻

延祐三年四月立正書石高八寸廣六寸厚二寸五分在
鄒平縣安氏翠微亭舊址

天地日月國王父母

右二行字徑一寸四分在碑之正面

翠微還景對雲峯花木成蹊錦繡叢看取田園子孫計安公端
不謬臆公

延祐三年四月 日安宅立

右七絕詩一首并年月凡五行字徑七分在碑陰

雲山三面盡花木四時春若問幽居處斯亭遠世塵
口水拖青練遙山列畫屏幽人深有意此地結茅亭

右五言絕句詩二首分刻於碑之兩側詩各二行字徑七

分

案鄒平縣志還景亭翠微亭俱在黃山竝安處士所構處士名安字仁甫嘗自製小碑高可盈尺螭頭龜座極精工久湮土中康熙三十年裔孫安士祿得於廢亭故址

賀公神道碑殘石

延祐三年五月立正書碑高三尺二寸廣三尺五寸五分在濟陽縣

右碑祇存上截文二十四行字徑一寸縣志云是趙孟頫撰書

興國禪寺塔苑碑

延祐三年五月立八分書篆額碑高六尺二寸廣三尺二寸在臨淄縣興國寺

右碑額題臨淄興國禪寺塔苑記三行字徑三寸文二十
三行字徑一寸林口開撰周琦書并篆額

二賢祠堂碑

延祐三年六月立行書篆額碑高五尺三寸廣二尺四寸
在濟寧州太白樓

右碑額題二賢堂碑二行字徑四寸四分文二十二行字
徑九分曹元用撰張楷書尚德勉篆額

孟廟加封孟子父母制詞碑

延祐三年七月立正書碑高三尺七寸廣二尺六寸文十
一行字徑二寸

石佛殿延祐石刻

延祐三年八月立正書碑高二尺七寸廣一尺四寸五分

在淄川縣治

右碑文十六行字徑七分李讓撰書

孔思晦襲封衍聖公碑

延祐三年九月立正書碑高三尺六寸廣二尺在曲阜縣孔廟

右碑文十八行字徑一寸碑文簡陋不畧撰人姓名

東嶽行祠碑

延祐三年十一月立正書篆額碑高四尺五寸廣二尺在淄川縣

右碑額題東嶽行祠之記三行字徑二寸陽文文二十行字徑九分撰書姓名殘缺

重修慈雲禪寺碑

延祐四年正月立并陰俱正書篆額碑高七尺七寸五分廣二尺九寸在濟寧州晉陽山

右碑額題重修慈雲禪寺二行字徑五寸文二十一行字徑一寸二分顏之義撰李玉書并篆碑陰額題宗派之圖四字橫列徑二寸上層刻僧衆宗派下層刻施主姓名字徑八分

張志純遺世偈石刻

延祐四年二月立正書石高一尺四寸五分廣二尺二寸在泰安府學

右刻偈頌題識凡十四行字體大小不等末有小字二行云萬歷甲午秋會真宮災刻無所附因移置關聖廟壁左云云則此碑初置會真宮明時移於關聖廟不知何時又

移於學宮

太師泰安武穆王神道碑

延祐四年四月立八分書篆額碑高一丈八尺四寸廣五

尺四寸在泰安縣城外舊校武場

大元太師泰安武穆王神道之碑銘

額三行字徑六寸大元二字橫列於首

大元太師泰安武穆王神道碑銘

姚燧撰

當大德癸卯燧持憲節使江之東三年光祿大夫上柱國江淞行省平章政事公之三子內口口太宮宿衛渾都與江東建康道肅政廉訪副使伯都及行河南省參知政事堃仙帖穆而譜其系狀其事以請曰先公三宿墳葬矣其忠以事國孝以繩家光大而雄偉者不及今焉鑲之金石將日遠日忘奚以示遺胄於無窮敢屬筆子燧以與憲副聯事此道義不可辭乃序之曰

公忙兀氏諱博羅謹畏答而公之曾孫蘸木曷公之孫瑣魯火
都公之子始畏答而與兄畏翼俱事太祖時太疇盛彊畏翼謀
往歸之畏答而苦止曰帝何負汝而爲是竟去追又不復雪泣
而歸請獨宜力帝貳之曰汝兄與衆皆往獨畱何爲無以自明
乃折矢誓曰所不忠事帝者有如此矢帝感其誠易名屑廕約
爲按答蓋明炳幾先與友同死生之稱帝後與王罕陳於曷刺
眞彼衆我寡敕兀魯一軍先發其將兀徹帶玩鞭馬鬣不應屑
廕請曰朕猶鑿也匪斧不入我先爲鑿請君斧繼顧帝訣曰臣
萬一不還三黃頭兒將軫聖慮者辰入疾戰大敗其軍哺猶逐
北敕使止之乃旋師免胄爲殿腦中流矢帝傷之曰朕戒卿早
休兵竟創而歸親爲傅藥寢與同帳踰月而卒帝曰曷只里吉
爲敵將實禦屑廕其以只里吉民百戶屬屑廕子世世歲賜勿

絕其族散亡者收完之卽封北方萬家太宗以其子忙各爲郡王又俾貴臣忽都忽大料漢民分城邑以封功臣割泰安州民萬家封郡王歸奏帝問忙兀之民何如是少對曰臣今差次惟視太祖之舊舊多亦多舊少亦少帝曰不然舊民少而戰績則多其增封二萬戶與十功臣同爲諸侯者民異其編兀魯爭之忙兀舊兵不及臣半今封固多於臣帝曰汝忘而先玩鞭馬鬣事耶後諸侯王與十功臣既有土地人民凡事干其城者各遣斷事官自司聽直於朝公年十六爲斷事官世祖正宸極以從征叛王阿里不各功賜其軍驟馬四百匹金銀幣帛稱是尋詔入宿衛曉近臣曰是勦闕諸孫從其出入禁闥無輒誰何李璫反詔將忙兀一軍圍濟南鈔益都萊州賊平決獄燕南人稱明允賜衣一襲雲南王虎各赤爲其省臣寶合丁輩毒殺事聞敕中

書擇可治其獄者凡四奏人皆不當旨丞相先真舉公且言敗
事臣請從坐帝曰之人則可公辭臣不愛死第年少目不知書
帝曰朕方恃卿求皇子死尚書別帖木而知書惟可使之簿責
其事是否一委自卿明日慎無歸咎輔行也且聞卿不善飲彼
地多瘴宜少飲敵之未至四五驛所資合丁遣人負金六簋來
迓公曰雲南去朝廷遼邈省臣握兵不安其心將懼而變乃好
爲語遣之既至盡以金歸省而竟其獄得置毒情殺之而還奏
可顧先真曰卿舉得人賜兼金爲兩五十武備寺奏今入觴角
惟忙兀以時夥於常歲帝曰其報賜之自今凡忙兀事無大細
如札刺而事統丞相安童者省統於博羅謹八年授昭勇大將
軍右衛親軍都指揮使虎符大都則專右衛上都則三衛兼總
十一年授金吾衛上將軍中書右丞大師南伐分軍爲兩制曰

其右授丞相伯顏阿朮節度左丞委卿指一犯法臣曰如別急
烈迷失朕不責也俄授兼淮東都元帥軍於下邳公策諸將曰
清河居宋北部城小而固與泗州昭信淮安寶相犄角當水陸
衝未易卒拔可頓大兵爲疑海州東海石湫違此數百里其守
必懈吾將輕兵倍程而東其守臣可襲勝也師至海州丁安撫
果下石湫東海隨下清河史安撫聞之亦下不一月而下四城
宋主旣降而淮東諸州猶城守故太傅伯顏入覲還密詔以公
進兵拔淮安南堡戰白馬湖及寶應棄高郵不攻由西小河達
漕河據濳頭堡斷通泰援竟拔揚州斬其制帥李庭芝淮東諸
州悉下賜西域藥及葡萄酒介冑弓矢鞍勒會分江南諸州隸
諸侯王及十功臣又益封桂陽州十四年遣平叛王只里幹帶
於應昌賜以輦帶幣帛與傅羅同署樞密院事未久授北京右

丞既至台還會南土多反者詔募民能從大軍進討者俾自爲軍其百夫千夫惟聽其萬夫長節度不役他軍制命符節一與正同已行矣公疾不能自陳令董司徒文忠入言今者日所出入勝兵何啻百萬何假此曹無賴僥倖之徒以壯軍威臣恐一踐南土肆爲貪虐斬伐平民妾其婦女橐其貨財民畏且仇反將滋衆非便召興疾入帝視其色瘁然賜坐與語重陳董奏可之適常德入懇唐兀帶一軍殘暴其境如公所策敕斬以循諸是軍皆罷之十六年曷刺斯博羅斯幹羅罕薛連干皆彊宗也勢不相一求遣大臣來泣詔令公往凡居是二年十八年以右丞行省甘肅時大軍駐西北仰哺省者十數萬人自陝西隴右河湟皆不可舟惟車輦而畜負之塗費之餘十石不能致一米石至百緡公經畫得方供億不乏賊不敢窺邊者二年廿有一

年授龍虎衛上將軍御史大夫江南諸道行御史臺事黃華反
徵內地戍兵進討未能平賊多奴良民以歸公令監察御史提
刑按察司隨在糾覈皆止還之以疾歸會諸侯王乃顏反帝欲
自將征之公曰始太祖分東封諸侯王及侯其地與戶臣如知
之以二十率之彼得其九忙兀兀魯札刺而宏吉烈亦其烈斯
五諸侯得其十一彼力滋多吾力滋少吾有衰耗彼亦衰耗然
要其歸五侯之力終多彼二惟責徵兵五侯自足當之何煩乘
輿臣背疾今愈請事東征制可賜介冑弓矢鞍勒命公董是五
諸侯兵以行與乃牙接戰屢推其鋒再與其黨一王塔不帶戰
霖雨不止軍以乏食求却公曰兩陣之間勿作事先已而彼軍
先勦公悉衆乘之逐北二日身中三矢禽塔不帶斬忽倫輩後
與月列魯太師合力始誅之賜銀爲兩四百五十幣帛九不再

月其黨一王哈丹復叛公再請往詔與諸侯王乃馬帶討之公
狃於屢勝一日不虞賊游兵卒至止從三騎返走有絕壑前廣
二丈深加廣半追兵且及獨公軍馬能越三人後者皆見殺人
以爲天相忠義後遂北極於東海之壩哈丹自引焚獲其二妃
斬其子老底於陳凡戰四年所俘金銀悉散將士以故人致死
力賊平敕一妃賜乃馬帶一妃賜公陳金銀器延春閣召東征
諸侯王及公至將分賜之

問公卿家是器幾何盤帶有無公曰以
陛下威德奉身
之物亦畢備矣

帝曰朕出此本以疇卿曹之勞在人則伐其能以幸多取

朕問猶曰既有可謂謙挹不眩于貨者豈令其徒手歸姑

賜是器五百兩二十八年改河南宜慰司爲行中書省求

可首是省平章者凡三

奏皆不

允末乃及公則

可授榮祿大夫平章政事淮鹽爲引歲六十五萬前政多逋至公如額而集

賜異幣一開封監縣帖兀兒告廉

訪使胡某不戢其民昏集曙散縣簿陳勘置巡屋器械於村又周劉光店爲墻四其門扁鋪司夜出入

詔公按之皆誣

杖而徙戍南邊河水遷流無常民訟退灘連歲不絕或以其地投獻諸侯王求爲田民自蔽公

奏正之仍著爲令河後

泛濫隄埽橫潰歸德睢州汴梁水及城下潏爲巨浸公親行水督有司捍完之

皇上元貞二年遷公平章陝西未行而

改復爲河南入

覲奏忙兀一軍戍北歲久衣率故弊請

以臣泰安州五戶歲入絲一斤積四千斤盡輸

內帑易爲

匹帛分資諸軍

上以爲益

敕遞車送達軍中

賜銀爲兩百五十

幣帛三

陸辭之日

上諭之曰卿今白須

世祖德音實足聽聞事更加愼中書平刺眞宣政院使大食蠻
台 奏始者伐宋

世祖分軍爲兩右則屬之伯顏阿朮左屬之博羅驢今伯顏阿
朮皆有田民而博羅驢獨不可後

上曰何久不言豈彼恥自白邪其於淮東所嘗戰地高郵已籍
之民 賜五百戶以上中下率之上而中下各二及園

背銀比再至汴踰年凡流外官久滯不銓旅食道官者旬口口
口之大德之元叛王岳朮忽而兀魯速不華來歸公遣使驛

開始是諸王叛由其父是輩小弱若無與知今焉來歸宜棄前

惡以勸未至

上曰是奏深契朕衷改平章湖廣

賜金鞍勒至汝寧合

福建省亏江淞授公光祿大夫上柱國江淞等處行中書省平章政事

賜

玉帶夏大旱隨禱而雨杭之豪民十家入

賂於官大爲釀務高其估而專其利酒日滴惡公變其法改省四憑其富蓄凌轢府縣肆爲姦利自刻木牌與交鈔雜行民間實侵貨幣與

國爭利又盜隄海之石公欲斬之而中書

刑曹當以杖然亦由是大姓始知重足立矣以大德庚子五月二十有二日薨于臨安寓舍年六十有三以其年七月八日葬于檀州西北太行山不封最其平生典兵則右衛都指揮使都元帥樞密院風紀則御史大夫宰相則三爲右丞四爲平章與夫四十七年馬足所及西南雲南西北金山東北海隅東高句

騶東南吳閩再討叛臣四征叛王其間事平而疾聞變請行惟
以有國難虞爲憂視轉鬪乎萬里之遠歷歲之久若堂奧之朝
夕焉雖風雪皸瘃其膚鋒矢交集其躬飲食饑渴不時其口體
皆不避恤必致寇首戢下歸報□□而止眞凜凜有曾考風
上尤眷重之若

世祖身御橐韃弓矢皆萬世傳寶不以

賜臣下者惟以

賜公海東青鵠雜

先朝多或十

賜惟至白鵠背爪玉如

聖語曉曰是禽惟朕及鷹師所鞠以卿世臣□□宣力之多日
桑榆□□娛心河南治地平行而遠且多陂澤鵝鵠所集時
出縱之使民得見 昭代春秋蒐田之盛不敢萌啟邪心
皆殊 錫也夫人兀怯烈氏□按檀氏□札刺而皆前公

卒今夫人札刺而氏王氏按檀氏宏吉烈氏男口人太宮憲副
參政博羅公於庭臣居家最名有法夜分不寐諸子列

侍其前聽談

祖宗故實無敢或歸私室燕奉樽俎迭歌舞以娛賓亦無有酒
失者女六長適國卜伯次口口徹干平章子僉書樞密院事完
者次適國王弟孛闌盼次適太師弟怯烈出次適山東宣慰使
必罕牙幼在室男女孫如干銘曰

皇矣

太祖肇造方夏右之左之惟十臣者公之曾考展一其中矢矢
歷告

帝視友同敵陳來加挺戈而出大崩其軍免胄而入五兵之長
無矢不仁由賊叩輪懋功是創

帝惻其心百夫償死

顧成嘉止既王其子逮分茅土

帝自等差國以泰安二萬其家公祖王季勤勸克類再傳而公
世祖之事勲閎遺苗

帝植以培而獨於公嘗譽其材聽於

禁闥無止入出翼

翼其心彌謹自律隨遇而安利患靡干承

命卽往奚遠

奚難東北海邦西南南詔甌閩炎陬金山遐徼聞有難虞必請
赴趨大獄叛藩無一漏誅人臣憲憲曰省臺院平章大夫宥密
鈞踐

先聖

今聖賚子優優良駟

天閑豪華

御鞵紫韉介冑

鞍帶衣裘黃白之金委家如邱皇矣

太祖于疆于理惟公曾考實成其始遺厥大難畀之

神孫神孫

世祖聞乾翁坤考其皇輿南北猶判孰是制右羸鬼歆裸大興
師征穀粿百城罔不箚壺竭蹙義聲傳其國都屏王銜壁蕞爾
淮東諸州□□ 詔公進攻盪蕩渠兇九域攸同公焉成
終□□之意悠悠或在成始之孫宜際斯會益封桂陽江嶺外
內於乃先烈克光以大嘗聞古先哲侯功臣泰山如礪國以永
存嗟公王孫國泰山下權輿礪如其自今也

延祐四年四月廿日男翰林學士承旨開府儀同三司知
制誥兼修國史埜仙帖穆兒建

右碑未見拓本朱朗齋云文鏤兩面漫漶殊甚今取縣志
與碑互證錄出如右銘詞內由賊叩輪與上句無矢不仁

叶韻是當與下句懋功是創倒互志已改正今仍碑文之舊而辨其誤如此博羅謹及其曾祖畏荅而元史皆有傳碑與傳所載大致皆同所不同者碑作畏荅而史作畏荅兒碑云易名屑塵約爲按荅蓋明炳幾先與友同生死之稱史云更名薛禪約爲按達薛禪者聰明之謂也按達者定交不易之謂也碑云曷刺眞史作哈刺眞碑云兀徹帶史作木徹台碑云只里吉史作只里吉實碑云忙各史作忙哥碑云博羅謹史作博羅歡碑云阿里不各史作阿里不哥碑云賜驃馬四百匹史作四十匹碑云虎各赤史作愛哥赤碑云先眞史作線眞碑云別帖兀而史作別帖木兒碑云石湫史作石秋碑云益封桂陽州史作益封桂陽德慶二萬一千戶碑云只里幹帶史云只里幹台碑云應昌

史作德昌碑云曷刺斯博羅斯幹羅罕薛連干史作哈刺
斯博羅思幹羅罕而無薛連干碑云月列魯史作月魯那
演碑云老底史作老的碑云岳朮忽而史作藥朮忽兒大
抵字音相近隨宜通用其有傳聞互異者碑與史所載不
同自當以碑爲正也史載公累贈推忠宣力贊運功臣太
師開府儀同三司上柱國加封秦安王諡武穆而碑悉略
而不書碑中男口人字模糊莫辨志則云四人然以碑與
史前後文核之只渾都伯都埜仙帖穆而三人非四人恐
志誤也公以大德庚子薨於臨安寓舍卽以其年七月葬
檀州太行山庚子是大德四年姚燧作墓誌在癸卯歲是
大德七年其立碑在延祐四年距公之葬又十五年矣疑
爲遷葬理或有之然碑無明文不知當時埜仙帖穆而何

以竟無一語述及泰安立碑之故也

重修金口閘碑

延祐四年六月立正書碑高六尺四寸廣二尺九寸在兗州府城東金口壩

右碑文二十行字徑一寸劉德智撰書

玉清宮詩刻

延祐四年七月立正書石高四尺四寸廣二尺三寸五分在濰縣玉清宮

昔日燒丹院今爲養老庵愛山非謂景慕靜不名貪四海水雲足五華歸計堪採薪塙脚北汲水皂頭南食粥渾身暖啜茶滿口廿一眞離妄想萬法更何叅有客不迎送無賓罷接談任教人見惟自喜老來愁

歲次丁未正月三日五華道院撰 北海儒人羅謙書

延祐四年七月日通義安和大師提點朱志誠立石

右詩刻五言八韻凡六行字徑二寸八分兩旁年月二行
字徑一寸朱朗齋攷爲李道元所作

仰天山輝公塔銘

延祐五年正月立正書石高一尺一寸五分廣一尺六寸
在臨朐縣仰天山文殊寺

右刻文十四行字徑六分無撰書姓名

仰天山一公塔記

延祐五年正月刻正書石高一尺一寸五分廣一尺四寸
五分在臨朐縣仰天山

右刻文十五行字徑五分無撰書姓名

文殊寺無疑悲濟禪師塔銘

延祐五年三月立正書凡三石高一尺一寸五分廣二尺五寸在臨朐縣仰天山文殊寺

右碑文二十四行字體大小不等刻徒弟立石諸名

文殊寺翠巖長老壽塔題字

延祐五年三月立正書凡三石高一尺廣一尺五寸在臨朐縣文殊寺

右碑文二十三行字體大小不等刻徒弟立石名凡二十

人

荆修宏陽觀碑

延祐五年四月立正書碑高六尺五寸廣二尺九寸在曹縣楚邱宏陽觀

右碑篆額未拓文二十行字徑一寸一分羽士魏道明撰
傳道源書并篆額

朝城縣學立杏壇記

延祐五年五月立正書碑高四尺廣二尺七寸在朝城縣
學

右碑文二十四行字徑一寸教諭解文會撰書

恩公講主塔銘

延祐五年九月立正書石高一尺七寸凡八面圍四尺四
寸五分在諸城縣廬山寺西隅

右刻文三十六行字體大小不等無撰書姓名

海公戒師塔銘

延祐五年九月立正書石高一尺六寸廣一尺一寸五分

在諸城縣廬山寺西北隅

右刻文十二行字徑八分無撰書姓名

魏必復等致祭東鎮廟碑

延祐六年三月立正書碑高四尺二寸五分廣二尺三寸
在臨朐縣沂山東鎮廟

右碑文二十行字徑一寸文稱皇元延祐己未皇帝特遣
承乏集賢臣魏必復必閣赤伯帖木兒致祭遍於東嶽東
海東鎮季春二十八日癸未賚輦御香織金幡二白金香
盒一中純鈔五錠俾供歲時香火之費云云後書魏必復
拜手記案延祐六年三月遣使祭告嶽鎮海瀆元史仁宗
本紀不書乃史家漏畧也

黃縣學加封孔子碑

延祐六年立正書碑高五尺五寸廣二尺九寸在黃縣學
右碑額未拓上層刻加封制詞二十一行字徑一寸下層
刻碑文二十八行字徑八分撰文者曹元嵩書丹者孫興
祖題額者李不作

錄事司新修廳壁記

延祐六年十月立正書碑高二尺廣二尺八寸舊在濟寧
州治

右碑原石已佚朱朗齋借李鐵橋家藏舊拓本錄之文三
十行教授國淵撰進士張鶴書丹

濟寧州學加封孔子碑

延祐七年七月立行書陰正書篆額碑高六尺九寸廣二
尺九寸在濟寧州學

右碑額題大元加封孔子之碑二行字體三寸上層刻制
詞十七行正書徑一寸五分下層刻記文及銜名二十三
行字徑一寸一分曹元用撰書輔惟良篆額碑陰刻濟州
官士姓名二十六行

延祐庚申祭孔廟碑

延祐七年七月立并額俱正書碑高六尺七寸廣二尺七
寸在曲阜縣孔廟

右碑額題大元祭孔子碑二行字徑二寸文二十二行字
徑一寸案仁宗延祐七年正月崩三月英宗卽位乃遣說
書王存義詣魯以太牢祠孔子手香加額以授之五月丁
亥成禮七月立碑稽之元史英宗本紀不書其事史之略
也碑文撰書題額皆曹元川一人兼之元川字子貞世居

阿城後徙汶上史稱元用由禮部主事改尚書省右司都事轉員外郎及尚書省罷退居任城久之延祐六年授太常禮儀院經歷屬英宗躬修祀事儀注率所裁定撰書之時正官太常經歷之歲而碑銜仍稱右司員外郎則其官太常經歷非延祐六年明矣似當據碑以正史也

延祐題門殘石

延祐七年十一月立正書石高一尺廣一尺八寸在益都縣

右刻祇存左半前之門二字徑五寸後銜名年月凡六行字徑七分

趙孟頫書三學資福禪寺額石刻

延祐七年十二月立正書碑高六尺廣三尺六寸在武定

府治東南

右碑額三覺資福禪寺六字二行字徑一尺九寸右欸一行字徑一寸七分又功德主田可宜口萬山及年月二行字徑八分左立石住持一行字徑一寸八分口萬山系銜稱棣州達魯花赤管金官案今之武定府惠民縣在元爲棣州厭次縣故功德主有棣州達魯花赤管金官此達魯花赤專管金銀礦者非監州也

青州城門延祐殘刻

無年月正書石高一尺六寸廣一尺四寸在青州府城東門

右刻未見拓本段赤亭云碑乃青州城東門將軍石也以前有延祐字知爲元時之刻且後載也先不赤黑的亦皆

元人凡存十二行三十餘字徑二寸

千佛寺碑

至治元年三月立并陰俱正書篆額碑高七尺七寸廣三尺一寸五分在萊蕪縣千佛寺

右碑額題重修廣教千佛寺記二行字徑二寸四分文二十八行字徑一寸馬希聖撰高秉崇書丹李世周篆額碑陰刻官吏姓名不計行數字體大小不等

長春真人門徒王史郭公碑

至治元年十月立并額俱正書碑高七尺五寸廣二尺九寸在淄川縣七里店修真觀

右碑額題王史郭公之碑二行字徑四寸文十八行字徑一寸聶明德撰張麟書

觀城縣學加封孔子制詞碑

至治元年十一月立國書譯文并額及陰俱正書碑高五尺二寸廣二尺五分在觀城縣學

右碑額題大元加封詔書二行字徑二寸六分碑上層刻國書大德十一年制詞下層刻譯文文俱同前碑陰記文九行字徑一寸三分右刻撰書銜名三行左刻年月及官吏銜名六行字徑六分張淳撰呂惟誠書并題額高從善蒙古字書

任城趙君墓碣銘

至治二年二月立并陰俱正書碑高七尺四寸廣三尺二寸在濟寧州南鄉寧車灣

右碑文二十二行字徑一寸一分首元用撰并書張楷篆

額碑陰額題趙侯宗支圖五字橫列字徑四寸中列宗支名字多漫滅

沂山神祐宮碑

至治二年九月立正書碑高四尺四寸廣二尺一寸在臨朐縣沂山東鎮廟

右碑篆額未拓文二十五行字徑八分桑居敬撰鄆道順書并篆額案四鎮加封事在大德二年二月自是歲時與嶽瀆並祀蓋以前祀典之所不及也加封沂山元德東安王遣官祀奠本紀不載此碑詳焉可補史之未備

重修東嶽行宮碑

至治二年十月立并陰及額俱正書碑高七尺六寸廣三尺在萊蕪縣東嶽廟

右碑額題東嶽行宮重修之記二行字徑三寸五分文二
十二行字徑一寸一分李利用撰李世周書高秉崇題額
碑陰刻官吏姓名三列俱字徑六分

靈岩寺請容公長老住持疏碑

至治二年十月立正書碑高三尺二寸廣二尺一寸在長
清縣靈岩寺

右碑文十七行字徑一寸二分

重建仙人萬壽宮碑

至治二年十一月立八分書篆額碑高七尺六寸五分廣
三尺一寸在鄒縣萬壽宮

右碑額題仙人萬壽宮重建記二行字徑三寸三分文十
八行字徑一寸一分後銜名五行正書大小不等文爲李

之紹撰劉賡書

駝山禱雨記

至治二年十一月立正書碑高四尺八寸廣二尺五寸在益都縣駝山昊天宮

右碑篆額未拓文二十一行字徑一寸陶惟明撰書并題額碑載完澤兩次禱雨皆獲靈驗段赤亭云元史兩完澤一見列傳係土別燕氏先世朔方人於至元二十八年拜右丞相卒於大德七年而此乃東平人又於至治二年蒞青疑卽宰相表至大四年拜平章政事之完澤也

亳州知州徐琛墓碑

至治三年三月立正書碑高五尺二寸廣三尺一寸在新泰縣和莊南徐公墓

右碑篆額未拓文三十六行字徑六分衍融撰并篆額

鑑書丹

虞帝廟碑

至治三年七月立正書碑高六尺廣三尺二寸五分在曹州府城東北歷山上

右碑篆額未拓文三十行字徑八分張頴撰補化書郭貫篆額

勝果院僧明通勤績記

至治三年九月立正書碑高六尺五寸廣三尺在歷城縣東北董家莊勝果院中

右碑額未拓文二十三行字徑一寸二分王炤撰書并題額

摹刻李太白壯觀二大字碑

至治三年立并陰俱正書陰額篆書碑高五尺廣二尺六寸在金鄉縣學

右碑刻壯觀二字徑二尺下有太白二小字碑陰額題天地日月天地父母篆書二行徑三寸其上空處隱隱有敬等字右角有正統九年字左角有李孟字俱正書中間首行刻大元至治三年金山新豐村馮時立正書字徑二寸次刻明洪武間張敬記文此據朱朗齋所錄載之未見拓本

福山縣文廟學田記

泰定元年二月立并額俱正書碑高四尺廣二尺二寸在

福山縣學

右碑額題福山縣文廟學田記四行字徑二寸五分文二十五行字徑八分張起巖撰劉遵晦書丹納合彥禮題額
碑陰失拓

泰定沂山代祀記

泰定元年三月立并額俱正書碑高五尺一寸廣二尺在臨朐縣沂山東鎮廟

右碑額題代祀記三字橫列字徑三寸二分文二十二行字徑九分尚毓德記呂頤書王訥題額

贈京兆郡侯杜公神道碑

泰定元年七月立正書篆額碑高九尺四寸廣三尺二寸在冠縣城西杜公墓前

右碑額題大元贈京兆郡侯杜公神道碑三行字徑三寸

五分文二十五行字徑一寸張士觀撰劉賡書并篆額
安氏遐景亭記

泰定元年九月立正書碑高三尺二寸廣一尺九寸在鄒
平縣黃山

右碑文十九行字徑九分濟南府尹王構撰

北海劉氏昭先碑

泰定元年十月立正書碑高七尺五寸廣三尺三寸五分
在昌樂縣城北黃村

右碑篆額末拓文三十二行字徑一寸末有石匠姓名撰
文者蔡文淵書丹者張起巖篆額者楊僖

棣州重修廟學碑

泰定二月四月立八分書碑高八尺四寸廣三尺三寸在

武定府學

右碑篆額未拓文二十五行字徑一寸張養浩撰郭貫篆額張起巖書

皇姑菴碑

泰定二年十月立國書陰正書碑高七尺三寸廣三尺一寸在濰陽縣

右碑篆額未拓前刻國書聖旨不可識且多闕泐碑陰文三十二行字徑九分王天秀撰文王毅書丹張恒篆額

茌平縣重修廟學碑

泰定二年十二月立并陰俱正書額八分書碑高六尺四寸廣二尺七寸在茌平縣學

右碑額題在平縣重修廟學記二行字徑二寸五分文二

十一行字徑八分梁宜撰劉淵書孔思晦篆額碑陰額題
士庶芳號二行字徑四寸三分陽文題名凡二百三人字
徑一寸

焦氏先塋碑

泰定三年三月立正書篆額碑高七尺九寸廣二尺七寸
在青城縣東門外焦氏墓上

右碑焦氏先塋之碑二行字徑三寸五分文二十五行字
徑八分元明善撰趙孟頫篆額劉從禮書丹碑載焦榮祖
理給賊全城之功其父文炳剖肝砥目之孝及榮歷官循
績皆可垂爲世教而史不爲立傳賴此碑顯之

靈巖寺壽公施財修寺記

泰定三年三月立正書石高二尺四寸五分廣一尺一寸

五分在長清縣靈巖寺

此碑右半嵌入寺壁拓本未全存者凡十一行字徑八分
重修玉皇宮碑

無年月正書碑高五尺廣二尺六寸在博山縣鳳凰山玉
皇宮故址

右碑額未拓文磨滅大半行數不計字徑五分撰書人姓名
皆缺立碑年月無攷以文中落成之歲在泰定三年丙寅
故增於此

高氏先塋碑

泰定三年立行書篆額碑高七尺廣二尺九寸在海豐縣
城西高氏墓上

右碑額濟南高氏先塋之碑二行字徑三寸八分黃潛撰并

書馮翼篆額

焦榮墓碣殘石

無年月正書碑高二尺三寸廣九寸在青城縣東門外墓前

右刻下截殘闕中題太中大夫松江知府焦公闕凡十字徑二寸五分右下角題口男焦口立五字徑八分案焦榮事蹟已詳焦氏先塋碑彼碑立於泰定三年其時焦榮尚在則此碣又在泰定三年以後矣

皇姊大長公主孔廟降香碑

泰定四年三月立正書篆額碑高七尺廣二尺七寸在曲阜縣孔廟

右碑額題皇姊大長公主降香碑三行字徑四寸張瀚撰

并書楊克明篆額案大長公主先於武宗至大元年十二月遣使致祭林廟立碑紀事碑稱皇妹此當泰定帝時故稱皇姊也

新建真武廟碑

泰定四年五月立正書碑高五尺廣二尺七寸在鄆城縣北門外元帝廟

右碑篆額未拓文十九行字徑一寸李泰撰并篆額末行有明正德十三年重立字

重修關帝廟碑

泰定四年六月立正書篆額碑高四尺四寸廣二尺二寸五分在莘縣定海門外關帝廟

右碑額題重修義勇武安王廟記三行字徑二寸文二十

四行字徑八分託託理忽都達兒撰李侃書薛魯篆額

萌山閨九日詩刻

泰定四年刻正書在嘉祥縣萌山石壁

右刻未見拓本朱明齋至其處得之首題五言絕句一首
字徑寸許乃泰定四年閨九日所作後刻同遊姓名六人
詩不甚佳故不載

赤琰公墓碑

泰定四年十一月立行書碑高九尺六寸廣四尺五寸在
魚臺縣東北大聶村

右碑篆額未拓文二十九行字徑一寸周仁榮撰石口書
并篆額

贈禮部尚書晁公神道碑

無年月正書碑高六尺七寸廣三尺九寸在鄆城縣城北
二十里

右碑祇存下截篆額未拓文二十一行字徑一寸一分王
士熙撰巉巉書張起巖篆額碑無年月可攷茲從朱朗齋
所次增於泰定四年之末

何約張鵬霄靈巖寺詩

泰定五年正月立正書碑高一尺六寸五分廣二尺三寸
在長清縣靈巖寺

天下名藍稱四絕方山雄典岱宗連 古淵堂上凭欄處似在
棲巖太華邊

泰定五年正月下旬日 中憲大夫前山東東西道肅政廉訪
副使河東何約畱題 承直郎前江東等道肅政廉訪司經歷

張鵬霄同來畱題

靈巖古佛剎雄映泰山巔環抱嵐光裏沈涵月照邊禪房森木
蔭梵宇衆星聯一到絕塵俗幽棲信有緣

當山住持沙門古淵 提點思讓 監寺思川同立石

書記恒勇書 李克堅刊

右詩刻十一行字徑一寸一分

郭氏祭臺石殘刻

泰定五年刻正書石高九寸廣一尺九寸五分在淄川縣
右殘刻存字十七行徑一寸

劉瓚代祀東鎮廟倡和詩刻

致和元年三月立正書碑高一尺五分廣二尺在臨朐縣
沂山東鎮廟

右詩刻并後跋凡二十四行字徑七分跋字徑四分集賢
都事劉瓚奉命代祀東鎮賦詩紀事縣尹胡居祐依韻和
之學正劉口口跋以刻石二詩無出色處故不錄

靈岩寺塑像題名碑

致和元年八月立正書碑高三尺六寸廣一尺八寸在長
清縣靈岩寺

右碑題名十行字徑一寸二分

蓋榮妻許氏墓碑

天歷元年九月立并額俱正書碑高五尺廣二尺在濟寧
州晉陽山西北道旁

右碑未見拓本據朱明齋所錄載之額題大元二字橫列
徑五寸中刻墓識四行字徑五寸右邊書人姓名一行左

邊立石銜名及年月二行

贈奉訓大夫王慶神道碑

泰定五年十一月立并陰俱正書篆額碑高七尺七寸廣三尺一寸在萊州府城南三里

右碑額題大元贈□□大夫知□□公神道□□三行字徑二寸八分文三十行字徑八分李僊撰□世榮篆額朱泰亨書丹碑陰額題東萊儒士王公善詩并序三行字徑二寸五分文多漫滅莫辨行數

陳顥等倡和詩刻

天歷元年十二月刻行書石高一尺五寸廣三尺在臨朐縣沂山東鎮廟

右刻詩七絕四首十七行字徑一寸五分後郝載跋五行

字徑七分右下角有石匠姓名案文宗卽位於致和元年九月改元天歷至十二月陳顥奉命祭告東鎮遂題是詩守土胡君祐趙晉郝載和之顥字仲明清州人仕仁宗朝官至集賢大學士仁宗崩辭祿家居者十年文宗卽位復起爲集賢大學士此詩蓋初起復時所作也顥號廓然傳所未載詩與跋皆俚俗無足深論

靈巖寺舉公勲績施財碑

天歷二年正月立正書碑高三尺六寸五分廣二尺一寸在長清縣靈巖寺

右碑文二十三行字徑九分住持智久撰

萬戶王珍墓碣銘

天歷二年二月立正書碑高四尺三寸廣二尺六寸在宛

州府東南王公墓上

右碑篆額未拓文二十五行字徑八分曾孫思誠撰李好文書岳至篆額

神山牛講師碑

無年月正書碑高五尺四寸廣二尺六寸在掖縣

右碑文已殘闕莫辨行數立石年月無攷朱明齋云碑稱牛講師羽化於天歷己巳是天歷二年卽立碑之年矣

力士房寧墓銘

天歷二年十二月立行書碑高四尺廣二尺六寸五分在滋陽縣

右碑篆額未拓文十七行字徑一寸二分王思誠撰張恒篆額高克明書

孔林四十七世孫孔若愚墓碑

無年月書體詳後碑高三尺五寸廣一尺二寸在曲阜縣孔林

右碑中題四十七世孫墓篆書一行徑四寸左右題字八分書四行徑一寸

孔林四十八世孫孔端立墓碑

無年月書體詳後碑高三尺七寸廣一尺六寸在曲阜縣孔林

右碑中題四十八世孫墓篆書一行徑四寸左右題字正書二行徑九分

孔林四十九世孫孔琥墓碑

無年月書體詳後碑高三尺七寸廣一尺一寸五分在曲阜

阜縣孔林

右碑中題四十九世孫墓篆書一行經四寸左右題字八分書四行徑一寸

以上三碑皆無時代年月朱朗齋以碑式同五十二世墓碑定爲孔思晦一時所立因以次列之

孔林五十二世孫孔之厚墓碑

天歷三年三月立書體詳後碑高五尺三寸廣二尺五分在曲阜縣孔林

右碑中題五十二世孫墓篆書一行經六寸左右題字正書四行徑二寸孫思晦立石

孔林五十三世孫孔浣墓碑

天歷三年三月立書體詳後碑高六尺四寸廣二尺九寸

在曲阜縣孔林

右碑中題五十三世孫墓篆書一行徑六寸五分左右題字正書四行徑二寸子思晦立石

靈岩寺執照碑

至順元年立并額俱正書側國書碑高六尺六寸廣二尺九寸厚八寸在長清縣靈岩寺

右碑額題泰安州申准執照之碑三行字徑三寸上層刻延祐五年三月執照十九行字徑八分年月上鈐蒙古印文下有二押中層至順元年十一月執照十六行字徑七分印押同前下層至順元年十二月執照二十五行字徑七分亦有印押碑側國書一行無譯文

滕縣學田碑

至順二年三月立正書碑高七尺七寸廣二尺六寸在滕縣學

右碑篆額未拓文二十二行字徑一寸虞集撰拓跋旭暉書李徽篆

伏生祠碑

至順二年四月立正書碑高六尺二寸廣二尺九寸在鄒平縣城北伏生祠

右碑篆額未拓文二十八行字徑一寸張起巖撰并篆額王居敬書丹

重修興國寺碑

至順二年五月立正書碑高八尺二寸廣三尺七寸在臨

淄縣興國寺

右碑篆額未拓文二十九行字徑一寸趙崇撰蔡塔不万
書丹并篆額

靈岩寺泉公首座壽塔碑

至順二年六月立并額俱正書碑高三尺五寸五分廣一
尺九寸五分在長清縣靈岩寺

右碑額題泉公首座壽塔六字橫列徑二寸八分文十四
行字徑一寸住持智久撰書記海昌書

范文正公祠堂碑

至順二年六月立正書碑高四尺七寸廣二尺四寸在鄒
平縣西南醴泉寺范公祠內

右碑篆額未拓文二十八行字徑七分張起巖撰并篆額
高天祐書丹

海豐縣學加封孔子制詔碑

至順二年六月立正書篆額碑高七尺二寸廣二尺三寸
在海豐縣學

右碑額題大元加封大成至聖文宣王碑三行字徑二寸
五分上層刻制詞十七行字徑九分下層刻記文二十七
行字徑八分王士元撰袁哈刺歹篆額拜住明善重書

靈岩寺亨公壽塔記

至順二年七月立并額俱正書碑高三尺六寸廣一尺七
寸在長清縣靈岩寺

右碑額題亨公首座壽塔六字橫列徑二寸八分文十七
行字徑九分住持智久撰

曲阜縣孔廟加封啟聖王制詞碑

至順二年九月立并額俱正書碑高六尺五寸廣二尺三寸五分在曲阜縣孔廟

右碑額題有元加封啟聖王制二行字徑三寸文十二行字徑一寸一分末有明宏治九年立石一行

加封孟子亞聖公制詞碑

至順二年九月立國書篆額碑高九尺五寸廣三尺在鄒縣孟廟

右碑額題皇元聖制二行字徑四寸七分上層刻國書制詞十一行左讀下層譯文十一行字徑二寸

靈岩寺慧公禪師壽塔銘

至順二年十月立并額俱正書碑高五尺五寸廣三尺在長清縣靈岩寺

右碑額題慧公禪師碑銘三行字徑三寸五分陽文二十
十五行字徑九分釋覺亮撰

張文忠公家訓碑

無年月正書額八分書碑陰草書碑高四尺四寸五分廣
三尺在歷城縣城內張文忠祠

右碑額題張文忠公家訓三行字徑二寸五分文十八行
字徑一寸四分末書後學諭立書碑無年月可系據黃潛
所撰祠記云祠建於至順二年三月則此碑當立於建祠
以後也碑陰額題八分書擬雅二字徑二寸六分中刻古
詩二首五律一首凡三列俱草書後刻至正十四年嗣男
引跋語正書十行字徑八分

趙崇東鎮廟詩記石刻

至順三年正月刻正書石高一尺四寸廣二尺三寸在臨
朐縣東鎮廟

右刻記文十四行字徑七分後七律一首七行字徑一寸
記詩並劣不錄

羅漢院德公大師壽塔銘

至順三年三月立正書石高二尺四寸凡六面圍三尺五
分在臨朐縣羅漢院

重修宣聖廟題名碑

至順三年五月立正書碑高三尺六寸廣二尺二寸在曲
阜縣孔廟

右碑篆額未拓文二十二行字徑八分張瀚撰東野潛書
孔思遙篆額

冶源殘碑

至順三年八月立正書碑高二尺廣一尺七寸在臨胸縣

冶源

右殘碑存字十六行字徑一寸

重修崇慶院碑

至順三年十二月立正書篆額碑高八尺四寸廣三尺在

滋陽縣崇慶寺

右碑額題重修崇慶院記二行字徑三寸六分文二十行
字徑一寸四分辛明遠記姚煒書郭貫篆額

臨胸縣學加封孔子制詔碑

至順四年五月立正書篆額碑高八尺六寸廣三尺在臨

胸縣學

右碑額題大元加封大成之碑二行字徑三寸上層刻大德十一年制詞十二行字徑一寸二分下層碑文二十五行字徑一寸魏中撰趙時中書丹賈瑞篆額

章邱縣廟學神門記

至順四年十月立行書篆額陰正書碑高五尺七寸廣二尺三寸在章邱縣學

右碑額題章邱廟學神門之記四行字徑三寸四分又二十四行字徑八分李泂撰宋本書忽都都魯彌實題蓋碑陰刻題名十八行字徑七分

武畧將軍徐仁墓碑

至順四年十月立正書碑高八尺八寸廣三尺五寸在曹

縣青堽集

右碑篆額未拓文三十行字徑九分劉賡撰并書王約篆額

平陰縣重修廟學碑

至順四年十月立正書篆額碑高七尺三寸廣三尺四寸在平陰縣學

右碑額題平陰縣重修廟學之記三行字徑三寸五分文二十三行字徑一寸一分李庭實撰并篆額張徵禮書丹
洪山題字

元統元年十二月刻行書在嘉祥縣洪山絕頂

右刻元統元年十二月日一行其前又有正書大德八年記一行此與後一種皆據朱朗齋所錄存之未見拓本

洪山題字五種

無年月書體尺寸未詳竝在嘉祥縣洪山頂上

右刻五種皆殘闕不成句以無年月可系姑附于元統題字後

武略將軍總管達魯花赤先塋神道碑

元統二年四月立行書碑高九尺二寸廣四尺在鉅野縣昌邑保

右碑篆額未拓文三十一行字徑一寸一分胡祖廣撰晏逢亨書史惟良篆元史百官志諸路總管府達魯花赤一員總管一員竝正三品兼管勸農事江北則兼諸軍奧魯山東地在江北故凡達魯花赤皆兼諸軍奧魯兼管內勸農事此碑結銜旣云總管府達魯花赤兼水路諸軍奧魯又云總管府達魯花赤管內勸農事若不厭其煩稱者與

他碑異例也達魯花赤秩正三品其階曰昭武大將軍昭
勇大將軍昭毅大將軍今碑乃稱武略將軍則是從五品
階矣殆當時制有參差百官志載之未備也

鄒平縣學田碑

元統二年四月立正書碑高四尺廣二尺三寸在鄒平縣
學

右碑篆額未拓文二十七行字徑八分張臨撰賈□□書
王克忠篆額

瑯琊郡公王氏先德碑

元統二年五月立正書碑高八尺四寸廣三尺五寸在高
唐州西南王氏墓上

右碑篆額未拓文三十八行字徑八分撰文者虞集

敕賜瑯琊郡公王氏先德之碑

奎章閣侍書學士翰林侍講學士通奉大夫知制誥同脩國史臣虞集奉敕撰

榮祿大夫中書平章政事臣敬儼奉敕書

翰林學士承旨榮祿大夫知制誥兼脩國史知經筵

事臣許師敬奉敕篆額

元統元年十月二十八日中書右丞相伯顏等言於

上曰中書左丞王懋德蒙恩褒贈其二代久矣謹具石表先塋以修

皇上之恩澤請以刻文屬諸國史虞集

制曰可臣集受

命案王氏系出瑯琊自宋初占籍高唐金人入中原有爲宋將

以其軍南渡而族人畱居焉 國初里中八九十歲老人能言
王氏數有衣紫佩金魚者歲時上塚必爲王氏子孫言之而譜
牒軼於兵諱字爵謚不復聞有諱善者勤儉自保不忘於學與
人居恂恂然足跡未嘗至公府平居寡疾性不餌藥目能視遠
至耄不衰生逢亂離鄉里親戚多不免於難每誦佛書以致其
悲思至元十年卒年八十二夫人周氏生二子曰玉先卒曰璣
幼以孝弟聞年二十九而歿今贈嘉議大夫兵部尚書上輕車
都尉追封瑯琊郡侯夫人薛氏追封瑯琊郡夫人子男四人曰
祐字景福者叅政公也是時方用兵江南大發民爲兵公之家
祖父旣老薛夫人寡居公纔十有七諸弟更幼於是公告其母
曰自先世粗有田業視其籍不能已於行與其私胥史以幸免
將不勝其誅求奮身戎行男子之事也安知其不可立功成名

乎夫人勿以兒爲憂也薛夫人泣涕而遣之遂行從攻襄陽二年克其城軍中以公善書計推擇爲更軍帥總兵守通州立安撫司兼治軍府之事州民新附未閑於國制多犯禁者公爲教飭而調護之其民遠罪而心服遂以無事坐曹終日觀古人之書以自勵以廉能聞淮東宣慰司辟爲掾弗果從事鎮江總管府遷丹陽佐史今制郡縣及五品以上官府行省爲調年勞吏一人爲之僚領案牘之會位在命吏之亞於事無所不得與聞公任是職歷杭之鹽司澈浦之市舶饒之餘干常之總府昇之溧陽所至有能聲其在丹陽表閭巷以正民俗治亭驛以待過客民不知勞行省求故宋公田而增其租公力爭之民懷其惠以爲前後來佐縣無如公者或值貪虐者至相與靳之曰此吾王君耶在杭州鹽司無所取於人家甚貧長官念之出公帑

羨餘使貸得子錢以自養公辭之其後官錢法密或以是取罪
獨公介然無所預人服其先見在餘干民有竊人衣而偶傷人
者吏當之死公曰良民也迫於飢寒耳盜已非其意初豈有傷
人之情乎決而遣之常州兵後民間事多草創公不以矯訐立
名不以因循廢事簿書期會之間民有所未便法有所未安或
直言或委曲必期於中理乃已在官未嘗妄施鞭扑有小過教
之使改不幸麗法不可免則哀矜以道之苟可減則減可緩則
緩是以得公爲佐者上無失刑下無廢人也移調溧陽卒於位
民亦至今猶思之今贈中奉大夫河南江北等處行中書省參
知政事護軍追封瑯琊郡公娶同里吳氏先公二年卒追封瑯
琊郡夫人子曰懋德今中書左丞也娶下邳張氏封瑯琊郡夫
人孫男克脩祕書監著作郎曾孫男二人縣縣老老王氏之塋

在高唐之西游家里懋德嘗謂臣曰昔先君以早從軍不得肆
意於學問及仕吳越間故宋學士大夫搢紳先生多有存者公
事之暇得以考德問業焉自六經諸史莫不徧讀久而益精時
與客論治亂成蹟首尾歷歷得其情致如身親見之宿學老生
自以爲不及事上官必本於誠待下必主於恕故雖以小官終
其身藹然有譽於當時而流澤於子孫非偶然也懋德始就外
傅程其課業甚嚴旦暮歸省每侍立逾時不敢退自經義時務
處已待人之法貪廉義利之辨引據譬喻使之通習未嘗稍假
以顏色或曰君一子宜少寬之公曰有子不教我之罪也不爲
之變是以懋德粗守禮律宦學以至于今不致廢隊以傷朝
廷用人之明則皆先君之教也吳夫人相先君能儉約以成其
廉食無重味衣具浣濯首無金寶之飾身無綺紉之華待妾御

寬而有禮視庶子不異於己出終身不見怒詈而家自肅如也
後懋德得厚祿夫人年且高足以爲養而夫人猶日親紉緝懋
德率子婦乘間言曰夫人可少自逸乎夫人正色曰衣服之共
婦人之職也汝敢有其厚祿乎自是家人以下惴惴然不敢少
自懈怠而懋德得自守以成先人之志不別治生以求贏而妻
子安之者毋夫人之教也先君歿時庶弟懋昭懋功懋敬長者
纔十五餘則甚幼懋德以先人之教教之今幸皆以儒試吏粗
有成立而克修亦不敢令廢于學也臣聞其言而感焉以爲懋
德蒙

上知遇身歷顯要其本有所自立哉懋德由憲府御史臺中書
掾除戶部主事拜南行臺監察御史內臺御史都省左司都事
御史臺都事歷河南燕南兩廉訪司副使天厯初 召僉中政

院拜左司郎中陞叅議明年立詹事院改詹事叅議未幾復叅中書俄拜治書侍御史陞侍御史謁告歸高唐 召還以疾未愈辭又拜太禧宗禋副使又辭

上使近臣爲書諭之來又辭久之遷淮西廉訪使遷江浙行省叅知政事 召拜資善大夫御史中丞尋拜中書左丞在行臺時言海北徭民之亂蓋有司多攝官無愛民之意所致也窮之以兵不若喻之以理憲司如其言兵不用而叛者服居者安又言貪暴吏不得志於良民入其罪而擅赅其門非與人爲善之意必請于 朝而後可從之在河南言臺官爲權臣倒刺沙所羅織下獄賈胡積年獻寶以罔 朝廷必空國賦以與之官吏以贓敗者旣伏其罪又欲誘而改之皆非

祖宗立風憲之意當是時無敢言者此章上中外肅然在燕南

時大名廣平飢有司請度地計口則費寡判其書曰非一視同仁之意也爲請于 朝得鈔十萬粟二萬五千計口全活者二十萬餘舊制罪囚因盤詰而自首或以所得贓還主者得減罪免刺而用刑者不知用則爲之申請使人得遷善焉在淮西取郡縣囚繫親錄之閱實其牘必得其情而後已是以詿誤得釋者六人坐誣寃得減死者數十人民以爲神明去淮西之日民相持泣不聽去蓋其明恕平反者甚衆類如此在省臺每入殿中奏事獻替黜陟皆係 國體人才之大者敷對詳明辭氣愿欵

先帝每顧視之曰王侍御議治體有君子之風廊廟遠大器也屬意甚厚臣又嘗侍 祠南郊見懋德以侍御史冠佩裳衣攝助奠官在

天子後王立長身肅然以溫侍從者咸歎以爲有德之容也詩
云如珪如璋令聞令望豈自外至者哉自其家之雍睦所養者
厚矣臣嘗爲之著德符堂記以爲今所得者因於昔矣今其家
父子守先德不敢廢墜則今將爲感而後復應之其所以爲
國家用者詎可量哉故爲之銘詩曰

高唐之墟 瑯琊來居 歷數百年 桑枌翳如 戴白之老
習知其素 結綬擁戟 有文有武 陵高谷深 物以代遷
孰微而興 孰強而騫 君子有家 世保令德 我苗我裔
弗幸於獲 昔生亂離 鄉邦弗支 我獨允臧 卒歲以嬉
乃生尚書 年不及秩 耄期在堂 寡幼在室 天誘瑯琊
俾奮以興 荷戈前驅 嬰城以升 乃治軍書 佐于幕府
強恕而行 莫子敢侮 新造之邦 俗不識禁 在宥以教

我翼我蔭 積勞以遷 屢佐列城 贊之用寬 民用不驚
位雖不充 盛德則有 於榮輝光 紆轡之久 在今左丞
奉其教忠 非禮勿履 非經弗窮 侃侃在朝 不徐不亟
言端氣溫 爲國司直 先帝有言 我之棟梁 金玉遺音
云何可忘 出入踐敷 王事靡盬 道經先廬 亦莫敢顧
鬱鬱舊阡 恩命維新 詔勒斯文 以勸後人
元統二年五月十二日建 湘中柳和仲摹刻 長清孫
正造

右碑篆額未拓文三十八行字徑八分碑乃王左丞懋德
身躋高位請於朝敕虞集等撰書以表其先世祖父之德
而因以及左丞之政蹟頗多經國愛民大端元史不爲立
傳但見其名於宰相年表然表載王懋德之爲左丞在至

元二三四等年其元統元年二年乃王結爲左丞非懋德也元史於宰執拜罷多掇拾簡牘書之簡牘未詳者闕之自不必信史而疑碑矣

重修關帝廟碑

元統二年八月立正書篆額碑高四尺三寸廣二尺四寸在高唐州城內關帝廟

右碑額題重修顯靈義勇武安英濟王之廟碑銘五行字徑一寸五分文二十九行字徑七分齊至道撰王康勇書康璧篆額

敕賜曲阜孔廟田宅記

元統二年立正書篆額碑高五尺三寸廣二尺九寸在曲阜縣孔廟

右碑額題大元敕賜曲阜孔廟田宅之記四行字徑三寸五分文二十八行字徑八分歐陽元撰揭傒斯書趙期頤篆

玉清觀重立觀額記

元統二年立并陰額俱正書碑高六尺三寸廣三尺在萊蕪縣東嶽廟

右碑額題重立玉清觀額之記四行字徑四寸五分上層刻貞祐敕牒十二行字體大小不等下層刻明昌記文十七行字徑八分續良弼撰又元統記文十五行字體大小不等鞏克亮撰高秉崇題額樊彝書丹碑陰刻官吏姓名三十二行凡二列

文宗皇后祠宣聖廟碑

元統三年二月立正書篆額碑高七尺三寸廣三尺在曲阜縣孔廟

右碑額題□□□□□皇太后祠魯宣聖廟之碑五行字徑三寸文二十行字徑一寸二分末銜名三行字徑八分撰文者張起巖篆額者趙期頤惟書人姓名已缺

重修報恩寺碑

元統三年三月立正書碑高六尺四寸廣二尺八寸五分在淄川縣報恩寺

右碑篆額未拓文三十行字徑八分張友諒書釋善秀撰萬山篆額

祝聖道院碑

元統三年三月立正書碑高六尺四寸廣三尺一寸在福

山縣祝聖道院

右碑額未拓文二十四行字徑一寸張起巖撰并書碑口
題額文後尚有施主官吏姓名已漫滅

濟州重修廟學碑

元統三年十一月立并陰俱正書篆額碑高六尺六寸廣
二尺六寸在濟寧州學

右碑額題濟州重修廟學之記四行字徑三寸八分文十
八行字徑一寸一分辛明遠撰并書倪朝吾篆額碑陰額
題題名二字橫列徑七寸中列官吏姓名凡二列